

Lei 9/1988, do 19 de xullo, de estadística de Galicia

Tramitación parlamentaria:

Proxecto de lei, BOPG núms. 241, do 9.4.1988, e 249, do 30.4.1988.

Emendas, BOPG núm. 255, do 18.5.1988.

Debate de totalidade, DSPG núm. 88, do 24.5.1988.

Informe da Ponencia, BOPG núm. 269, do 15.6.1988.

Dictame da Comisión, BOPG núm. 274, do 23.6.1988.

Mantemento de emendas e votos particulares, BOPG núm. 274, do 23.6.1988.

Debate e aprobación polo Pleno, DSPG núm. 95, do 29.6.1988.

Publicación:

Boletín Oficial do Parlamento de Galicia núm. 280, do 6.7.1988.

Diario Oficial de Galicia núm. 148, do 3.8.1988.

Boletín Oficial del Estado núm. 237, do 3.10.1988.

Lei 9/1988, do 19 de xullo, de estadística de Galicia

Pola Lei 7/1993 foron modificados os artigos 35, 37.b), 38, 44 e 47 e mailo capítulo III do título II desta lei, e así mesmo tamén lle foi engadido un segundo parágrafo no apartado 4 do artigo 24.

Pola Lei 8/2011, foron modificados os artigos 2, 47.1, 48.2 e 48.5.

Pola lei 16/2006 foron modificados os artigos 24 b) e c), 29, 30.1, 35.1, 44 e 47.1.

Pola Lei 8/2011 foron modificados os artigos 2, 47.1, 48.2 e 48.5.

Chegar ó coñecemento o máis obxectivo e completo posible da realidade socio-económica dos países é unha esixencia crecente por parte da sociedade así como das institucións que a serven. Na evolución que se está a dar trátase non só de que os Gobernos e as súas dependencias dispoñan de información suficiente desa realidade para a máis axeitada toma de decisións, senón tamén de que esa abondosa información sexa un ben común, accesible a todos.

As técnicas estadísticas, polo seu carácter cuantificador e ó mesmo tempo poderosamente sintetizador, son un dos mellores procedementos existentes para ver de chegar ó coñecemento obxectivo e completo da realidade socio-económica, o que explica o seu crecente uso por parte de tódolos Gobernos tanto para ter en conta datos desa orixe na súa toma de decisións, e para o seguimento e avaliación dos resultados que de tales decisións se deriven, coma para poñer eses datos á disposición da sociedade.

O Estatuto de Autonomía de Galicia expresa a importancia que lle concede a esta problemática ó declarar no seu artigo 27, apartado 6, que é competencia exclusiva desta «a estadística para os fins da Comunidade Autónoma de Galicia».

Consecuencia da citada disposición estatutaria é a necesidade de desenvolver adecuadamente a organización que faga efectiva a competencia tratada. A existencia desa necesidade faise máis patente ó ter en conta que non só é a información estadística e o estudo da realidade o seu obxectivo, senón tamén que cada vez máis a distribución de fondos e a asignación de recursos procedentes das Administracións Públicas, especialmente os derivados da integración española na Comunidade Económica Europea, se fai depender legalmente de variables estadísticas como por exemplo o paro, o valor de produción engadido, os indicadores de servizos sociais atinxidos e outras nas que se reflexa o nivel de riqueza e benestar.

Como introducción ó desenvolvemento organizativo correspondente á competencia estadística da nosa Comunidade Autónoma, o Decreto 148/1984, do 6 de setembro, creou o Centro de Información Estadística de Galicia. Nese Decreto indicábase tamén a necesidade dunha Lei de Estadística axeitada ás esixencias actuais, así como a elaboración dun Plan Estadístico no que se estruturan os diversos traballos estadísticos que se van realizar.

A presente Lei é o marco xurídico para coordena-las distintas institucións públicas existentes en Galicia co fin de integrar e harmoniza-la elaboración de estadísticas que se reflexarán no Plan Estadístico e nos Programas Anuais.

Estrutúrase en dous Títulos. No Título I, que á súa vez se divide en catro Capítulos, regúlanse os principios e as disposicións xerais da actividade estadística na Comunidade Autónoma Galega, sendo así que se regula o papel do Consello para o Plan e Programas Estadísticos, os principios de obxectividade e a corrección técnica, así como a obriga de colaboración e de segredo estadístico co seu posible rexime sancionador, indicando ademais a normativa de aprobación e a obriga de dar publicidade dos resultados estadísticos.

O Título II recolle a organización estadística da Comunidade, constituída polo Instituto Galego

de Estadística, os órganos estadísticos das Consellerías e o Consello Galego de Estadística; as funcións destes así como os principios de organización, artellamento e medios indícanse nos distintos Capítulos do Título.

No texto e no espírito da Lei está sempre presente a busca da melloira na información estadística, da obxectividade, do rigor técnico e da necesaria homologación, de acordo con normas xerais, que permitan a análise, a comparación e a integración de resultados cos de calquera outro espacio xeográfico.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Galicia e co artigo 24 da Lei 1/1983, do 22 de febreiro, reguladora da Xunta e do seu Presidente, promulgo, en nome de El-Rei, a Lei de Estadística de Galicia.

Título I

A estadística da Comunidade Autónoma de Galicia

Capítulo I

Disposicións xerais

Artigo 1

A presente Lei ten como obxectivo regula-la actividade estadística para os fins da Comunidade Autónoma de Galicia.

Artigo 2

Para os efectos desta Lei, enténdese por actividade estadística galega a recopilación, elaboración e ordenación sistemática da información cuantificable, a publicación e difusión de resultados necesarios ou útiles para o coñecemento cuantitativo, a análise da realidade demográfica, agraria, pesqueira, industrial, comercial, financeira, de servicios, social e cultural de Galicia e, en xeral, calquera cuestión referida ás condicións de vida, fins e competencias da Comunidade Autónoma.

Artigo 3

A presente Lei regula e protexe a actividade estadística levada a cabo con carácter oficial pola Xunta de Galicia e polos entes públicos galegos de carácter territorial, así como polos organismos e polas empresas dependentes dos mesmos.

Artigo 4

Esta Lei non regula as enquisas de opinión.

Artigo 5

A actuación referente á estadística da Comunidade Autónoma de Galicia adecuarase, especificamente, ós principios de interese público, obxectividade, corrección técnica, obrigatoriedade da colaboración cidadá, respecto á intimidade, segredo estadístico e publicidade dos resultados na forma que se determina no Capítulo III.

Capítulo II

A actividade estadística

Sección 1.^a

Do Plan e dos Programas Estadísticos Anuais

Artigo 6

1. O Plan Galego de Estadística é o instrumento da ordenación e planificación da actividade estadística da Comunidade Autónoma de Galicia.

2. O Plan Galego de Estadística será obxecto de aprobación polo Parlamento mediante Lei, e terá a vixencia establecida no mesmo, ou, no seu defecto, a de catro anos.

Artigo 7

A elaboración do anteproxecto do Plan Galego de Estadística correspóndelle ó Instituto Galego de Estadística, e será elevado ó Consello da Xunta para a súa aprobación, logo de informe do Consello Galego de Estadística.

Artigo 8

1. Malia o disposto nos artigos anteriores, a Xunta de Galicia con carácter excepcional poderá dispoñer por Decreto a elaboración de estadísticas non incluídas no Plan Galego de Estadística se apreciase a súa conveniencia e despois de transcorrido un ano desde a aprobación do Plan. Do

devandito acordo deberá dársele conta ó Parlamento.

2. As estadísticas a que se refire o apartado anterior tamén gozarán dos beneficios recoñecidos na presente Lei.

Artigo 9

1. Para o desenvolvemento e a execución do Plan Galego de Estadística, o Consello da Xunta, por proposta do Conselleiro de Economía e Facenda, aprobará un Programa Estadístico, que terá a vixencia de un ano natural.

2. A elaboración do proxecto do Programa Estadístico corresponderalle ó Instituto Galego de Estadística, logo de informe do Consello Galego de Estadística.

Artigo 10

As normas reguladoras de cada estadística aprobaranse por Decreto, o cal determinará como mínimo:

- a) Os obxectivos.
- b) O ámbito territorial.
- c) A periodicidade.
- d) As Consellerías ou os organismos da Xunta que levarán a cabo a actividade estadística.
- e) O presuposto estimado para cada estadística.
- f) As persoas ou entidades obrigadas á subministración de información, así como a forma e os prazos nos que se debe subministra-la mesma.

g) A forma e os prazos, se é o caso, nos que se deberá difundir-la estadística.

Artigo 11

1. As estadísticas de específico interese para as entidades territoriais e para os outros entes públicos poderán incluírse no Plan Galego de Estadística.

2. Son requisitos para a súa incorporación:

- a) Solicitud dirixida á Consellería de Economía e Facenda.
- b) Memoria explicativa na que se detallen as características e o interese público da estadística.
- c) Memoria económica e custo que asume a entidade interesada.

d) Informe do Instituto Galego de Estadística e das Consellerías afectadas.

3. Así mesmo as corporacións e asociacións que representen intereses sectoriais poderán solicitar, cos mesmos requisitos do apartado anterior, a inclusión de estadísticas de interese público no Plan Galego de Estadística.

Artigo 12

1. As estadísticas elaboradas polas entidades territoriais e demais entes públicos, non incluídas no Plan nin nos seus Programas Estadísticos, poderanse homologar polo Instituto Galego de Estadística se se adaptan ás normas técnicas establecidas pola Xunta nesta materia.

2. No caso de estudos subvencionados pola Administración Pública, a actividade estadística será sometida ás normas técnicas establecidas polo Goberno de Galicia por proposta dos órganos competentes na materia.

3. Na difusión do resultado destas estadísticas non incluídas no Plan Galego de Estadística farase constar se están ou non homologadas polo Instituto Galego de Estadística.

Artigo 13

1. As actividades estadísticas que desenvolva o Instituto Galego de Estadística en execución de convenios de cooperación ou colaboración cos organismos oficiais competentes na materia seranlles comunicadas previamente polo Director do Instituto ó Conselleiro de Economía e Facenda e ó Consello Galego de Estadística.

2. Das actividades estadísticas realizadas en virtude destes convenios daráselle conta ó Parlamento de Galicia.

Sección 2.^a

Aprobación dos resultados estadísticos

Artigo 14

1. A aprobación dos resultados estadísticos farase de acordo co disposto no Plan Galego de

Estadística e, no caso de que este non o determinase, coas normas reguladoras en materia estadística.

2. A aprobación provisoria dos resultados corresponderalle ó Instituto Galego de Estadística. Ó tempo de se faceren públicos poñeranse en coñecemento do Consello Galego de Estadística e da Xunta de Galicia, e se non recibisen obxeccións expresas no prazo de tres meses quedarán oficialmente aprobados.

3. Os resultados das estadísticas oficiais serán, despois da súa publicación no *Diario Oficial de Galicia*, de aplicación obrigatoria ás relacións e situacións xurídicas nas que a Comunidade Autónoma de Galicia teña competencia para impoñelos.

Capítulo III

Principios e garantías da actividade estadística

Sección 1.^a

Do principio de interese público

Artigo 15

A presente Lei protexe as estadísticas elaboradas por motivos de interese público, tendo tal consideración as incluídas no Plan Estadístico e aquelas ás que alude o artigo 8.

Sección 2.^a

Dos principios de obxectividade e de corrección técnica

Artigo 16

As estadísticas elaboraranse con criterios obxectivos e de conformidade cos principios científicos que aseguren a súa corrección técnica.

Artigo 17

1. Corresponderalle ó Instituto Galego de Estadística preparar as normas polas que se rexerán e as características técnicas que terán as estadísticas, respetando ó máximo os principios de universalidade así como os de peculiaridade galega.

2. As devanditas normas técnicas aprobaranse por Decreto da Xunta.

Sección 3.^a

Da obriga de colaboración

Artigo 18

As estadísticas incluídas no Plan Galego de Estadística, nos Programas Estadísticos Anuais e as previstas nos convenios de colaboración ós que se refire o artigo 13 desta Lei terán, para a súa elaboración, a obrigatoriedade de colaboración cidadá.

Artigo 19

1. Cando se soliciten datos de carácter persoal deberáselle proporcionar ó interesado información suficiente sobre a natureza,

características e finalidade da enquisa, advertíndoo, ademais, da voluntariedade ou non da colaboración e do segredo que se gardará respecto dela.

2. Se a subministración de información fose obrigatoria, advertirase ós suxeitos afectados das sancións que se lles poderán impoñer por non colaborar ou por facilitar datos inexactos, incompletos ou fóra de prazo.

Artigo 20

Os cuestionarios non poderán conter preguntas que teñan unha relación directa co dereito ó honor, á intimidade persoal e familiar e ás conviccións relixiosas ou políticas do informante. Os cuestionarios respetarán en todo caso o disposto no artigo 18 da Constitución Española.

Artigo 21

1. A obriga de subministrar información veraz, cando sexa formalmente esixida, comprenderá a tódalas persoas con independencia da súa natureza, física ou xurídica, privada ou pública, e da nacionalidade daquelas, sempre que teñan o seu domicilio, a súa residencia ou estean establecidas dentro do ámbito territorial da Comunidade Autónoma de Galicia. A información poderá ter por obxecto actividades levadas a cabo fóra do dito territorio se fose apropiado ás finalidades perseguidas pola estadística e estivese previsto polas normas reguladoras da mesma.

2. A mesma obriga incúmbelles a tódalas Administracións Públicas situadas en Galicia, no que se refire ás actividades levadas a cabo dentro deste territorio.

Artigo 22

1. A información deberá ser subministrada no tempo, na forma e coas características aprobadas nas normas reguladoras de cada estadística e polas persoas que estas determinen.

2. As normas reguladoras poden establecer que a información sexa subministrada en forma agregada e por escrito.

Artigo 23

A norma reguladora de cada estadística sinalará, se é o caso, o dereito á compensación económica polos gastos que haxa de asumir-lo informante para subministrarlle a información, se estes gastos son provocados pola esixencia de soporte informático ou doutro sistema de información que teña unha complexidade técnica especial ou que obrigue a unha recopilación previa de datos que na forma demandada non se encontrén á disposición da administración ordinaria do informante.

Sección 4.^a

Do segredo estadístico

Artigo 24

1. Serán obxecto de protección e quedarán amparados polo segredo

do estadístico tanto os datos relativos ás persoas físicas coma ás persoas xurídicas.

2. O segredo estadístico amparará a totalidade de datos individualizados de orde privada, persoal, familiar, económica ou financeira utilizados para elaborarlle a estadística.

3. Os datos individuais facilitados por razóns estadísticas non se poderán usar en ningún caso para finalidades fiscais ou policiais, nin para calquera outra distinta daquela para a que foron solicitados.

4. O segredo estadístico é vulnerado non só pola comunicación directa de datos non autorizada, senón tamén pola comunicación de datos dos que se poida deducir razoablemente información individual.⁽¹⁾

Artigo 25

1. Os datos que sirvan para a identificación dos obrigados a subministrarlle información débense destruír cando a súa conservación non sexa necesaria para o desenvolvemento das operacións estadísticas.

2. En todo caso, os apelidos e o enderezo dos obrigados a subministrarlle información separaranse dos demais datos.

(1) Polo artigo único.1 da Lei 7/1993 foille engadido un segundo parágrafo ó apartado 4 do artigo 24.

Artigo 26

1. Tódalas persoas, organismos e institucións que interveñan nas operacións reguladas pola presente Lei terán a obriga de mante-lo segredo estadístico respecto dos datos comunicados. Esta obriga conservarana as persoas aínda despois de concluí-las súas actividades profesionais e a súa vinculación cos servicios estadísticos.

2. En virtude da devandita obriga, os datos individuais comunicados non se poderán facer públicos nin se lle comunicarán a ningunha persoa ou entidade.

Artigo 27

1. O deber de segredo estadístico iniciárase desde o momento no que se facilite a información por el amparada e terá unha duración de cen anos.

2. Excepcionalmente, e sempre despois de transcorreren sesenta anos, poderánselle facilita-los datos amparados polo segredo estadístico a quen acredite ter interese lexítimo, unicamente para os efectos de análise histórica, e pretenda a publicación do resultado das devanditas análises.

Artigo 28

O incumprimento do deber do segredo estadístico dará lugar a responsabilidades indemnizatorias dos danos e prexuízos causados, nos termos establecidos no ordenamento xurídico, con independencia das responsabilidades penais e dis-

ciplinaras sobre os funcionarios e demais persoal público, e da potestade sancionadora á que se refire o Capítulo IV deste Título.

Sección 5.^a

Da publicidade dos resultados estadísticos

Artigo 29

1. A publicación ou difusión dos datos estadísticos farase sempre globalmente, sen referencias de carácter individual, de acordo coas normas reguladoras do segredo estadístico.

2. As estadísticas comprendidas no Plan Galego de Estadística serán obxecto de difusión pública. O acordo da aprobación dos resultados estadísticos será publicado no *Diario Oficial de Galicia* ou no boletín correspondente.

3. O órgano ó que lle corresponda aproba-lo resultado pode tomar acordos complementarios sobre a publicación ou edición do mesmo.

Artigo 30

1. Os resultados estadísticos globalizados obtidos por actividade propia ou asumidos por calquera entidade sometida a esta Lei serán publicados desde o momento en que sexan aprobados. Calquera persoa pode demandar unha certificación, que lle será enviada por escrito, en soporte informático ou por calquera outro medio, segundo as características da solicitude.

2. As Universidades e os centros de investigación recoñecidos poden establecer acordos co Instituto Galego de Estadística ou, se é o caso, coas Consellerías e coa Administración Pública territorial para a explotación das bases de datos destinados a elaboralas estadísticas reguladas por esta Lei; estes acordos terán por finalidade exclusiva favorecer a investigación científica. Co fin de preservar o segredo estadístico, o Instituto Galego de Estadística supervisará o proceso de consulta dos datos citados e elevarálle-lo informe correspondente ó Conselleiro de Economía e Facenda e á autoridade superior do departamento ou Administración asinantes do acordo.

3. A través do Instituto Galego de Estadística calquera persoa pode demandar información estadística das estadísticas reguladas por esta Lei a un nivel de agregación diferente daquel no que estivesen publicadas, salvando sempre a garantía do segredo estadístico.

4. O Instituto Galego de Estadística é o único organismo habilitado para emitir certificacións oficiais respecto das estadísticas elaboradas pola Xunta e respecto das estadísticas das entidades territoriais incluídas no Plan Galego de Estadística.

Artigo 31

1. A publicación ou a difusión da estadística é gratuíta cando así o determine a norma reguladora respectiva.

2. No ámbito da Xunta, os prezos esixidos serán determinados debidamente mediante tarifas acordadas e publicadas para este fin polo Instituto Galego de Estadística e non son consideradas como taxas administrativas.

3. No ámbito das entidades territoriais, a esixibilidade, a natureza e a aprobación das contraprestacións ateranse á lexislación específica que lles sexa aplicable.

Capítulo IV

Rexime sancionador

Artigo 32

Son infraccións administrativas na materia estadística as accións e omisións contrarias ás disposicións legais contidas nesta Lei.

Artigo 33

As infraccións ó preceptuado nesta Lei poderanse considerar leves, graves ou moi graves.

A) Consideraranse infraccións leves:

1.— Non proporcionar ou face-lo de xeito incompleto a información e advertencia ás que alude o artigo 16.

2.— Subministrar información obrigatoria para efectos estadísticos fóra de prazo, se existise requirimento previo do órgano estadístico legalmente notificado.

B) Consideraranse infraccións graves:

1.— A reincidencia na comisión de infraccións leves.

2.— Non facilitar datos ou proporcionalos incompletos cando a enquisa sexa obrigatoria, sempre que existise o requirimento a que se alude na letra A).

3.— Incumpri-las normas técnicas aprobadas na materia estadística.

4.— Incumpri-la obriga de entregarlle ó Parlamento ou á Consellería de Economía e Facenda os resultados das estadísticas.

C) Consideraranse infraccións moi graves:

1.— A reincidencia na comisión de infraccións graves.

2.— A subministración de datos falsos, ben sexan de comunicación voluntaria, ben de comunicación obrigatoria.

3.— Difundir ou comunicarlles a persoas non autorizadas datos individualizados amparados polo segredo estadístico.

4.— Comunicarlles datos a persoas non obrigadas a mante-lo segredo estadístico de xeito que diso se poida deducir información confidencial sobre datos persoais.

5.— Esixir información para a elaboración de estadísticas sen te-la condición de persoal estadístico.

Artigo 34

1. As infraccións das normas desta Lei serán obxecto de sancións administrativas, logo de instrución do correspondente expediente sancionar, e sen prexuício das responsabilidades civís e penais que procedan.

2. As infraccións leves e graves sancionaraas o Conselleiro de Economía e Facenda e as moi graves o Consello da Xunta de Galicia.

Artigo 35

1. Serán aplicables as seguintes sancións:

a) As infraccións leves sancionaranse con multa de 10.000 a 50.000 pesetas.

b) As infraccións graves con multa de 50.001 a 250.000 pesetas.

c) As infraccións moi graves sancionaranse con multa de 250.001 a 1.000.000 de pesetas.

2. En todo caso, para a graduación das sancións aplicables terase en conta a transcendencia da información, a conducta do culpable e os danos e prexuícios causados a terceiros e ós servicios estadísticos.

3. Para os efectos do disposto no artigo 33, entenderase por reincidencia a comisión dunha infracción análoga á que motivou a sanción no prazo do ano seguinte á notificación desta. Neste suposto requirirase que a primei-

ra resolución sancionadora xa adquirirse firmeza na vía administrativa.⁽²⁾

Artigo 36

As sancións administrativas neste Capítulo non serán obstáculo para a existencia de responsabilidades ós infractores ante a xurisdicción ordinaria ou contencioso-administrativa.

Título II

A organización estadística da Comunidade Autónoma de Galicia

Capítulo I

Disposicións xerais

Artigo 37

A organización estadística da Comunidade Autónoma de Galicia estará constituída por:

- a) O Instituto Galego de Estadística.
- b) Os órganos estadísticos das Consellerías.⁽³⁾
- c) O Consello Galego de Estadística.

(2) Reprodúcese a versión orixinaria. O artigo 35 foi modificado polo artigo único.2 da Lei 7/1993.

(3) Reprodúcese a versión orixinaria. A letra b) do artigo 37 foi modificada polo artigo único.3 da Lei 7/1993.

Capítulo II

O Instituto Galego de Estadística

Sección 1.^a

Creación e funcións

Artigo 38

1. Pola presente Lei créase o Instituto Galego de Estadística, que se configura como organismo autónomo de carácter administrativo con personalidade xurídica propia.

2. O Instituto Galego de Estadística quedará adscrito á Consellería de Economía e Facenda.⁽⁴⁾

Artigo 39

Son funcións do Instituto Galego de Estadística:

1.— A dirección e coordinación da actividade estadística no ámbito competencial da Comunidade Autónoma de Galicia.

2.— A coordinación da actividade estadística levada a cabo polas distintas Administracións Públicas de Galicia.

3.— Levar a cabo as estadísticas ou as fases das mesmas que lle encomenden o Plan Galego de Estadística e os seus correspondentes Programas Estadísticos, así

(4) Reprodúcese a versión orixinaria. O artigo 38 foi modificado polo artigo único.4 da Lei 7/1993.

como calquera outra que lle poidan encomendar ou que se estableza en virtude de convenios con outros organismos estadísticos.

4.— Colaborar en estadísticas de interese estatal ou supraestatal promovidas polos organismos competentes.

5.— Promove-la aplicación de normas e requisitos técnicos unitarios para as estadísticas galegas e a aprobación de códigos e nomenclaturas de interese propio, intentando que se adapten e integren no contexto das estadísticas estatais e supraestatais, dándolle-la maior difusión posible.

6.— Elaborar, actualizar e estar presente no deseño e na confección dos ficheiros-directorios que utilizarán os órganos e entes da Administración Autónoma de Galicia. Así mesmo, deberá ser escoitado no deseño e na reforma dos procedementos administrativos da Comunidade Autónoma que, pola súa natureza, poidan ter consecuencias na produción de informacións de posible utilización estadística.

7.— Coordena-las peticións e mailas solicitudes en materia estadística das distintas Consellerías respecto de calquera outra institución ou organismo da Administración Central ou Local.

8.— Prestar servicios de recopiliación, almacenaxe e difusión da documentación estadística dispoñible.

9.— Desenvolver bases de datos sobre a información estadística de interese público para Galicia.

10.— Analiza-las necesidades e a evolución da demanda de estadísticas en Galicia.

11.— Relacionarse con organismos estatais e internacionais con competencia sobre materias estadísticas e propoñerlle ó Consello da Xunta integrarse neles.

12.— Asegura-la difusión axeitada das estadísticas publicadas de Galicia, a través dos medios máis pertinentes, e extender certificacións dos resultados estadísticos da súa competencia.

13.— Velar polo cumprimento das normas técnicas aprobadas e pola aplicación das garantías necesarias para que sexan respetados o segredo estadístico e as outras condicións xurídicas ás que se debe suxeita-la actividade estadística.

14.— As demais competencias que se lle atribúan na presente Lei.

Sección 2.^a

Organización do Instituto Galego de Estadística

Artigo 40

A estrutura do Instituto Galego de Estadística determinarase mediante Decreto. Á fronte do mesmo existirá un Director, que será nomeado polo Consello da

Xunta por proposta do Conselleiro de Economía e Facenda.

Artigo 41

1. Correspóndenlle ó Director do Instituto Galego de Estadística as seguintes competencias:

1.^a.— A representación legal do Instituto.

2.^a.— A xefatura do persoal do Instituto e de tódolos servicios do mesmo.

3.^a.— O impulso, a dirección e maila coordinación da actividade do Instituto.

4.^a.— Tódalas demais que lle correspondan ó Instituto e que non fosen atribuídas expresamente a outros órganos do mesmo.

2. No desenvolvemento das súas funcións, o Director actuará con total independencia en tódolos aspectos técnicos e científicos relacionados coa actividade estadística de Galicia.

Sección 3.^a

Facenda e presuposto do Instituto Galego de Estadística

Artigo 42

A facenda do Instituto Galego de Estadística estará formada por:

1.— As asignacións procedentes dos Presupostos Xerais da Comunidade Autónoma de Galicia.

2.— As asignacións procedentes dos presupostos doutras entidades públicas.

3.— As aportacións de calquera outra entidade ou persoa pública ou privada.

4.— As cantidades que deba percibir Galicia como consecuencia de convenios de cooperación coa Administración do Estado e con outros entes públicos por razón das actividades desenvolvidas polo Instituto.

5.— Os ingresos obtidos polas súas actividades de xestión e explotación, así como os dos servicios que poida realizar.

6.— Calquera outra asignación autorizada polas leis.

Artigo 43

O presuposto para o desenvolvemento da actividade do Instituto Galego de Estadística elaborárase anualmente e con suxección ó preceptuado na materia para os organismos autónomos administrativos pola Lei 3/1984, do 3 de abril, de Xestión Económica e Financeira Pública de Galicia, e polas demais normas que a complementen ou desenvolvan.

Capítulo III

Órganos estadísticos das Consellerías⁽⁵⁾

Artigo 44

Os órganos estadísticos das Consellerías terán, no desenvolvemento

(5) Reprodúcese a versión orixinaria. O capítulo III do título II foi modificado polo artigo único.5 da Lei 7/1993.

mento das súas actividades, as seguintes funcións:

1.— Elaboración das estadísticas propias da Consellería.

2.— Elaboración das estadísticas ou fases das mesmas que lle encomenden o Plan Galego de Estadística e os seus Programas Estadísticos.

3.— Colaboración co Instituto Galego de Estadística na elaboración do anteproxecto do Plan Galego de Estadística e dos seus Programas Estadísticos Anuais.

4.— Publicación dos resultados das estadísticas propias, logo da remisión dos mesmos ó Instituto Galego de Estadística para a súa homologación.

5.— Colaborar co Instituto Galego de Estadística no deseño e na confección dos ficheiros-directorios que utilizarán os órganos e entes da Administración Autonómica de Galicia.

6.— Analiza-las necesidades estadísticas da Consellería.⁽⁶⁾

Capítulo IV

O Consello Galego de Estadística

Sección 1.^a

Creación e funcións

(6) Reprodúcese a versión orixinaria. O artigo 44 foi modificado polo artigo único.6 da Lei 7/1993.

Artigo 45

Créase o Consello Galego de Estadística como máximo órgano consultivo da actividade estadística da Comunidade Autónoma de Galicia, para asegura-la participación dos axentes sociais e a relación entre a Administración e os usuarios da información estadística, promove-lo seu entendemento e facilita-la coordenación e o uso de metodoloxías comúns.

Artigo 46

O Consello Galego de Estadística será consultado sobre:

1.— O anteproxecto do Plan Galego de Estadística. Para tal fin emitirá informe preceptivo no prazo de dous meses desde a data da súa remisión polo Instituto Galego de Estadística.

2.— Os proxectos dos Programas Estadísticos Anuais.

3.— A adecuación e utilización dos conceptos, definicións, clasificacións, códigos e nomenclaturas utilizadas pola organización estadística da Comunidade Autónoma de Galicia na súa actividade estadística.

4.— O contido do banco de datos estadísticos considerado no artigo 39 e o acceso á dita información por calquera tipo de usuario.

5.— Os eventuais conflitos de competencia entre órganos estadísticos da Comunidade ou con outros alleos a ela.

6.— Os proxectos concretos en materia estadística que lle sometan á súa consideración.

7.— A aplicación concreta da lexislación vixente en cada momento sobre o segredo estadístico, nos casos en que se presenten diferentes interpretacións.

8.— Calquera outra cuestión que lle presente o Consello da Xunta ou o Instituto Galego de Estadística.

Sección 2.^a

Composición do Consello

Artigo 47

1. O Consello Galego de Estadística estará composto polos seguintes membros:

a) O Presidente, que será o Conselleiro de Economía e Facenda.

b) O Vicepresidente, que será o Director do Instituto Galego de Estadística.

c) Un representante por cada unha das Consellerías da Xunta de Galicia.

d) Dous representantes do Consello das Cámaras de Comercio galegas.

e) Dous representantes das asociacións de empresarios, elixidos polas respectivas organizacións máis representativas.

f) Catro representantes das organizacións sindicais elixidos polas

súas respectivas organizacións máis representativas.

g) Tres representantes das organizacións de agricultores.

h) Dous representantes das organizacións de mariñeiros.

i) Catro representantes da Administración Local.

l) Un representante da Universidade de Galicia.

ll) Tres persoas de relevancia profesional no campo da estadística.

m) Un funcionario do Instituto Galego de Estadística, que desempeñará o cargo de Secretario do Consello, con voz e sen voto.

2. Os representantes a que se alude nas letras d), i) e l) do apartado anterior designaranse da forma que regulamentariamente se determine e ós que se refire a letra ll) serán nomeados polo Consello da Xunta por proposta do Conselleiro de Economía e Facenda.⁽⁷⁾

Sección 3.^a

Funcionamento e medios

Artigo 48

1. O Consello Galego de Estadística actuará en Pleno e en Comisións, de acordo co Regula-

(7) Reprodúcese a versión orixinaria. O artigo 47 foi modificado polo artigo único.7 da Lei 7/1993.

mento de funcionamento interno que aprrobe o mesmo.

2. As xuntanzas do Pleno serán ordinarias e extraordinarias, e terán lugar, en todo caso, por convocatoria do Presidente. Das ordinarias celebraranse dúas ó ano. As extraordinarias celebraranse por instancia da metade dos membros do Consello ou da maioría dos da súa Comisión Permanente, ou por iniciativa do Presidente.

Os acordos do Pleno tomaranse por maioría simple, sendo dirixentemente o voto do Presidente en caso de empate.

3. No Consello Galego de Estadística funcionarán unha Comisión de Coordinación da Organización Estadística da Comunidade Autónoma de Galicia e unha Comisión Permanente.

A Comisión de Coordinación, presidida polo Director do Instituto Galego de Estadística, estará constituída polos membros do Consello representantes dos organismos estadísticos da Comunidade Autónoma de Galicia.

A Comisión Permanente terá por finalidade o seguimento da realización dos programas de execución do plan e cuestións semellantes. Estará formada por once membros do Consello, elixidos de entre os membros do mesmo, os cales nomearán ó seu Presidente.

4. O Consello poderá crear, para o mellor desenvolvemento das súas competencias, no seu seo

grupos de traballo dos que formarán parte os membros do mesmo que se determinen en cada caso e tamén, se se considera de interese, outras persoas alleas ó Consello. A Secretaría destes grupos de traballo, que deixarán de existir cando remate a misión para a que os crearon, será cuberta por un funcionario do Instituto Galego de Estadística nomeado para tal efecto polo seu Director Xeral.

5. O Consello, ademais dos informes técnicos que faga no desenvolvemento das súas competencias, elaborará anualmente unha memoria sobre a súa propia actividade e sobre o estado e as perspectivas da actividade estadística na Comunidade Autónoma de Galicia, que se lle elevará ó Consello da Xunta para que emita informe, a cal será feita pública.

6. Os medios que precise o Consello para o seu correcto funcionamento serán cubertos polo Instituto, con cargo ó seu presuposto.

Disposición adicional única

Facúltase ó Consello da Xunta para revisar anualmente a contía das sancións previstas na presente Lei, co fin de adecualas ás modificacións experimentadas polo índice xeral de precios ó consumo.

Disposición transitoria primeira

Nun prazo non superior a oito meses, a partir da entrada en vigor

da presente Lei, o Consello da Xunta presentaralle ó Parlamento un proxecto do Plan Galego de Estadística.

Disposición transitoria segunda

Nun prazo máximo de tres meses, a partir da entrada en vigor da presente Lei, constituirase o Consello Galego de Estadística, e, nun prazo non superior a cinco meses da entrada en vigor da presente Lei, o Consello Galego de Estadística aprobará o seu Regulamento de funcionamento interno.

Disposición transitoria terceira

Á entrada en vigor da presente Lei transferiránselle ó Instituto Galego de Estadística, que agora se crea, os medios materiais e persoais e as correspondentes dotacións presupostarias actualmente afectas ó Centro de Información Estadística de Galicia, creado polo Decreto 148/1984, do 6 de setembro, así como as dotacións complementarias que se consideren convenientes para o seu correcto funcionamento neste primeiro exercicio.

Disposición transitoria cuarta

Os convenios ou acordos asinados previamente polo Centro de Información Estadística seguirán a rexerse pola súa propia normativa.

Disposición derogatoria

Quedan derogadas cantas disposicións se opoñan ó disposto na presente Lei.

Disposición derradeira

O Consello da Xunta e a Consellería de Economía e Facenda, no ámbito das súas respectivas competencias, adoptarán cantas disposicións sexan necesarias para a aplicación e o desenvolvemento da presente Lei.

Santiago de Compostela, 19 de xullo de 1988

Fernando Ignacio González Laxe
Presidente

